



VISITANDO IL MUSEO DELLA CIVILTA' CONTADINA (di Gianfranco Alinovi)

A m'arcordi.....

**A m'guerdi d'intorna e i pensér i s'jn vàn
a quand séra un putén, e j'andèva d'istèda
a cà di me nonn, chi fev'n i paizàn
in t'un sit a Neviàn, in do fniva la strèda.**

**Trei stansi, la stala, al fnìl, al granèr
al céssò dré l'ort, al gozèn in t'al stabil,
al recint con 'na pégra e dentr'al polèr
na quinzenna d'galenni e i cunì in tel gabij.**

**La cmensa bonora la vita in campagna
col scùr, prìma ancòra ca canta al galètt:
ghe d'andèr in t'la stàla, dal vachi, ca 's'lagna,
chi spet'n al magnèr e la paja in tal létt.**

**L'é bél'ora ed mònzer, po' ghé la classión
Na scudéla d'lat, penna mont, e na fèta
d'pan dur da pocèr cme s'al fuss un bonbón,
e s'at ghè 'ncòra fàma, dö fèti d'pansèta.**

**Me nona la porta al lat al casél
col baser in spala e du caldarèn;
me nonn con frenna, forchèta e rastél
al va zò in t'al prè a sghèr l'erba pr'al fèn.**

**Mi dagh (*curi sà*) da magnèr al galenni,
e po' vagh ad alveregh su j'öv in do j fàn;
la sarà na pietansa ed cùli pu fenni,
un' öv cott a balètt, con du grugn e'n po' d'pàn.**

Me nona in cusenna a fer la fojèda,

po' la va a tirer sù un po' d'acqua dal poss;
in sima la séza ghe stèz la bughèda,
al cagnètt in t'la cùcia al s'lècca al so oss.

Quand ghé l' Gazzettino e fiscia l'oslèn
sèma tutt sdù a magnèr e in silensi a sintìr
col chi dizn'n a la radio; e prima ca fnissa al vèn
me nonn in t'la mnestra al ghe fa n' bél sorbìr.

E dòpa al diznèr ghe da fer al pizlètt
in t'la cambra ca sa d'naftalina e d'orenna;
a ghe l' moschi ca gira ataca ai travètt,
d'in dö penda un salam ch'é mofi zo in cantenna.

L'é ancòra c'la fola anch' in tal dop'mesdì:
el bestji, la stala, al lat... po' in cusenna
a snèr: s'fa dö ciàccri, po' s'piana tutt lì
e s'va sùbita a lett, a spetèr la matenna.

A g'vol d'la pasénsia a fer i paizàn;
al s'va adrè a la stagiòn, a s'fa col ca s'pöl;
se spera ch'el Sgnor daga semper na màn
quand'é ora cha piovva o ca véna al söl.

Al söl e la lonna, al vent e pò i squass,
la brenna e la neva e, Sgnor jutém, la timpésta;
a 'sguerda a praria prima d'fèr un quelch pass
e se'l temp al te juta, allora l'é fésta.

Quand a' ghe i lavor gross, a la so stagiòn,
ghe bisògna d'ajut e tutt i paizàn
ca sta lì dintorna i dventen garzòn
e i giren pri sijt a deregh na màn.

S'ghé da méder e bàter, da rèr o semnèr
indumièr e mostèr per po' fer al vén;
quand as'sèmna al melgòn a ghé da scartoccèr,
s'va catèr su 'l castagni o ca s'masa al gozén...

Un bel piatt ed sùpa e dö fèti ed salam
le la pèga pri lavorant gnu a jutèr,
con un fiasc ed ven scètt e magari un cavagn
'd pomm rozòn profumè, madurì in t'al solèr.
La cà di me nonn l'é semper avèrta;



sa riva un querch'dòn a se gh'fa ciarena
gh'é sempr'un bicer ed ven bón e da perta
semper quel da magnèr, ca ne s'vaga via senza...

Quand véna la fésta as va tutt in césa,
col rezdori in t'al banc e j'ommi drè in pé,
quand a prèdica al pret l'à véna un po' pésa
ma po' l' é'n piazér muccèr's in t'al sagré.

A's ciciàra un po' insèmel dal pù e dal meno:
d'la vùgna, d'la stala, dal fén, dal formént,
i putèn is'corn adrè cme si fissen al treno,
i gionvòt e'l siorenni i zdàn l'apuntamént...

E in tal dopmezdi a ghé l'osteria:
el cherti, la mora e s'fa na cantèda,
un bicer ed lambrusc o von d'malvazia;
a basta col poch per na béla giornèda.

'Na volta in campagna l'andeva mo csi;
Basteva c'ag fuss da magnèr e dormir.
Se d'zèva su 'l bèn a la fen d'tutt i di,
Se spetèva in pasènsia col ch'èva da gnir.

Passè pù d'cinquant'ani, al mond l'é cambiè
mo l'é 'n bél lavör tgnires semper da'ment
ca gh'èma el ravisi in tal temp ca s'ne andè
e che j vecc ca s'a insgnè a semnèr al forment...

Ahn voj miga dir c'la fuss mej da chi indré;
mo a guarder chi d'intorna as fa'n grupp int'la gola,
a véna j occ luster a penser col che stè
quand la vùta ancóra l'as parèva na fola.

A chi steva in campagna agh'véna i sgrisór
e s'réva in t'la mènta na fnestra sarèda;
per d'sintir tutt j armòr e taster i savór
che na volta a limpiva na béla giornèda.

E la pòra ca quata tutt col ch'é pasè
con del querti bondanti mo trasparenti,
la sbiadissa appena j odor c'tè nazè
e sa'te stricch j occ, ancóra a t'ja senti...

Odor 'd sendra e d'lisiva al di d'la bughèda,

**e i pagn stéez al sol ca sèva ed savòn;
al dolegh coj pom fritt, al sofritt con pistèda,
al pan penna cott dentr'al cavagnòn.**

**Al parfùmm dal formènt muccè in t'al granèr,
d'i cassett dal comò con i masolèn d'fiór;
di pomm e di péer sparpajè in tal solèr;
e d'l' erba e dal' fen, ca te slargheva al cór.**

**Gh'era anca la stala, che un po' la spusseva
e 'l so odor al t' limpiva dal scherpi ai cavì;
mo senza fastidi, che a la svelta a se'gh vieva,
e segh feva anca al bagn, in t'un soj, in du o trì.**

**E in cusenna, ogni tant, nuvli ed fljitt,DDT,
primma d'saver che se l' moschi a moriva
quel poch ed bonn t'ariss fatt anca a ti..
mò al parfùmm ed pulì l'era col ca's sintiva.**

**A s'éra poverètt, mo col poch a basteva
pr' eser content e pr' ander a dormir
col cor pu alzér, parché se spereva
ca fuss anca mej col ch'eva da gnir.**

**Alora in méza ai arnéz e a la roba d'na volta
muccè chi da Guatelli con pasensia e passìon
ghé n'ètra béla ocasiòn anca stavolta
d'arcorder col ch'é stè e tutt col gh'era ed bòn.**

Luglio 2007